

黃氏逸書考

謝沈後漢書序

昔唐李濟翁資暇集遼僧廣濟龍龜手鏡各
著出處并著其所出書之第幾卷第幾頁以
示有徵

本朝實事求是拾骨家務爲其難今姚本縱
不能細注原引卷頁何致昧其本來卽如謝
靜思曾撰晉書三十餘卷余已仿龍龜手鏡
例同近輯十八家晉史刊入逸書考史部中
矣靜思本傳作行思會稽山陰人閑居養母

服闋除尚書度支郎明鍊經史有史才先著
後漢書百卷及毛詩漢書外傳詩賦文論皆
行於世或謂一百一十二卷殆兼後漢書漢
書外傳而言歟是書與偉平謝書袁書司馬
書薛記東觀記皆經惠定宇先生取爲今後
漢書補注范書全襲華書視偉平書東觀記
人物僅十之四五畧事實而趨詞采誠不可
無補而注之者爲章懷諱臣所不解定宇先
生于深甯叟鄭易旣用資暇集例至今奉爲

拾骨正宗而獨於補注范書時引用如此種
書不注來處竟與姚本同定翁且然他何足
論徒以有舉莫廢而仍錄侍御原輯本爲逸
後漢書之一

道光辛丑長至日甘泉黃奭右原

附姚之駟原序

山陰謝沈有孝行博學多識明練經史何充
庾冰並稱沈有史才遷著作郎撰司馬書三
十餘卷及毛詩漢書外傳詩賦文論皆行於

世典午史云沈曾著後漢書百卷余靖以爲
一百二十二卷又云官祠部郎未知孰是今
茲所存雁豹之一班孔鸞之一羽耳然觀其
述禮儀祭祀諸志原原本本似不欲攘人美
以爲已有者亦良史才也史稱其學在虞預
之右信然沈字行思中興書作靜思

子史鉤沈

逸書考

謝沈後漢書

甘泉黃恩掄

序

士庶流宕他州異境

文選張景陽七命注引謝沈後漢書序又見皇

甫士安三都賦序注明刻六臣注作謝沈切刻李善注作謝承

光武

光武攻清陽不下引兵欲攻宛至小長安與

甄阜戰敗

水經清水注惠棟後漢書補注一

甄阜等敗光武于小長安東乘勝南渡黃澤

水前營背阻兩川謂臨泚水絕後橋示無還
心漢兵擊之三軍潰溺死黃淳水者二萬人
同上惠氏補注一

安帝

永初元年郡國大水漂沒民人死者以千數
姚之駟後漢書補逸案續漢書五行志二安
帝永初元年郡國四十水出漂沒民人注引
死者以千數姚蓋以五行志補足文義

永初六年正月甲寅謁宗廟

後漢書安帝紀注

桓帝

延熹九年揚州六郡連水旱蝗害

姚氏後漢補逸

赤眉

赤眉攻雍卿

續漢書郡國志三注姚本燕有雍卿赤眉所下脫攻字蓋亦融

會郡國志以成文

東平憲王蒼

上以公卿所奏明德皇后在世祖廟坐位駁

議示蒼

姚本蒼上有東平王三字又重一蒼字

上言文武宣元

祖祫食高廟皆以配先帝所制典法設張大雅曰昭哉來御愼其祖武又曰不愆不忘率

由舊章明德皇后宜配孝明皇帝於世祖廟
同席而共食

續漢書祭祀志下注

朱鮪

光武攻洛陽朱鮪守之上令岑彭說鮪曰赤
眉已得長安更始爲胡殷所反害今公爲誰
守乎鮪曰大司徒公被害鮪與其謀誠知罪
深不敢降耳彭還白上上謂彭復往明曉之
夫建大事不忌小怨今降官爵可保况誅罰
乎

文選邱希範與陳伯之書注與謝承同見
明刻六臣本

鄭敬

敬閒居不修人倫新遷都尉逼爲功曹廳事
前樹時有清汁以爲甘露敬曰明府政未能
致甘露此青木汁耳辭病去隱處精學蛾陂
中陰就處延竝辟不行同郡鄧敬因折芟爲
坐以荷薦肉瓠瓢盈酒言談彌日蓬廬葦門
琴書自娛光武公車徵不行

後漢書鄧曄傳注

鍾離意

鍾離意譏起北宮表云未數年豫章遭蝗穀

不收民飢死縣數千百人

續漢書五行志三注

龍邱萇

萇篤志好學王莽篡位隱居太末以耕稼爲

業

惠棟後漢書補注十七

時鍾離意爲主簿白請萇爲門下祭酒

同上

楊厚

厚潛身藪澤耦耕誦經司徒楊震表薦其高操公車特徵不就益州刺史焦參行部致謁厚惡其苛暴時耕于大澤委鉏疾逝參志恚

之收其妻子錄繫欲致厚還不知所在乃出
其妻子

惠氏後漢書補注八

三君

三君者一時之所貴也竇武劉淑陳蕃少有
高操海內尊而稱之故得因以爲目

世說品藻篇注

八俊

俊者卓出之名也

同上

胡廣

太傅胡廣博綜舊儀立漢制度蔡邕因以爲

志譙周後改定以爲禮儀志
姚氏後漢書補逸案續漢書禮儀志上注引作謝承

蔡邕

蔡邕引中興以來所修者爲祭祀志

續漢書祭祀志

上注

蔡邕撰建武已後星驗著明以續前志譙周
接續其下者
續漢書天文志上注

閔貢

閔貢字仲叔
姚氏補逸

牛蘭山

牛蘭山也

續漢書郡國志四有牛蘭累亭
注姚本作魯陽有牛蘭山

羌胡

屬國降羌胡數千人居山田畜

續漢書郡國志五參綠故

居安定下注姚本首有參綠有青山五字

袁崧後漢書序

劉子元史通謂范書所採凡編年四族紀傳五家是舊後漢書應有九種以袁彥伯後漢紀尙行於世彥伯卽山松之從昆弟故舊書之不傳於今有待今人拾骨者惟八種耳山松書亦八種之一晉書載山松陳郡陽夏人國子祭酒袁瓌之孫琅邪太守喬之子其父曾注論語山松能世其學小有才名史稱著後漢書百篇卽此書也更著宜都記爲史所

不載而其說亦往往見於他處姚魯斯侍御
輯後漢書補逸獨於善音樂酣醉出游好作
挽歌之末節津津道之無關書旨矣姚又言
世說注多引此而實則三國志注水經注文
選注北堂書鈔初學記白孔六帖藝文類聚
太平御覽事類賦各部中尙有踪跡可尋無
怪記文達公作四庫提要惜其不著所出之
書使讀者無從考證是其所短然而筆路藍
縷姚爲首庸不揣孤陋爲一一著其出處重

編付梓是編仍不等筌蹄之棄惟就其案語
太支離者去之至袁書文多排疊喜志災祲
皆非史裁所尙不知侍御又何以稱焉山松
厯吳郡太守殉孫恩之難正史外往往連山
松爲一字作袁崧云

道光辛丑孟秋甘泉黃奭右原

附姚之駟原序

袁崧亦作袁山松陳郡人官司馬朝秘書監
著後漢書百卷劉孝標注世說多採之與袁

宏爲從舅弟一紀一書疑同時所作故不相爲引顧一門皆良史才何其盛也舊傳崧善音樂好行路難曲乃父其詞酒酣縱歌之間者皆爲涕下又出遊每令左右作挽歌時人目爲道上行殯與張湛齋前種松事並稱其風流概可知已別有宜都記一書軼見他說殆長于詞筆者今覽其光武論文多排疊而喜填藻語頗爲六朝橐籥然書中志災祲爲多將以垂示鑒戒庶幾作史者之微旨焉後

以孫恩亂被害文人無終惜哉

子史鉤沈

逸書考

袁山松後漢書

甘泉黃奭學

光武

光武封泰山雲氣成宮闕

初學記五白帖五御覽三十九

天子自雒陽遷都長安初長安遭赤眉亂宮室焚盡唯有高廟遂居之

御覽五百三十一

前漢自成哀已下天地縱橫巨猾竊命劉氏舊澤猶存而瞻烏之望殆絕世祖以眇眇之猶起白水之濱身屈無妄之力位與羣賢並

列于時懷璽者十餘建旗者數百高才者居
南面疾足者爲王公茫茫九州瓜分齟切湣
湣蒼生塵消鼎沸我扇之以仁風驅之以大
威雪霜被而茨棘枯橫網振而逆鱗掃羣材
畢湊人鬼與能數年之間廓清四海雖曰中
興與夫始創業者庸有異乎誠哉馬生之言
固已寥廓大度同符高祖又等太宗之仁兼
孝宣之明一人之體其殆于周故能享有神
器據乎萬乘之上矣

藝文十二惠棟後漢書
補注一羣賢作羣賢南

面王公上俱有之字其殆于周作其殆乎同

明帝

帝諱陽一名莊字子麗

藝文十二惠氏後漢書補注二

章帝

孝章皇帝弘裕有餘明斷不足閭房讒惑外戚擅寵惜乎若明章二主損有餘而補不足則古之賢君矣

御覽九十一惠氏後漢書補注二

殤帝

六州河濟渭洛洧水盛長泛溢傷秋稼

續漢書五

袁山松後漢書

二

行志三注延平元年惠氏後漢書補注三引於安帝紀六州大水下

安帝

永初六年甲寅謁宗廟

後漢書安帝紀注

桓帝

建和二年河東木連理

藝文九十八

建和二年河東瓜兩體共蒂

御覽九百七十八

龍死長可百餘丈

續漢書五行志三延熹七年六月壬子河內野王山

上有龍死注引長可百餘丈五字又見後漢書襄楷傳注引

是時連月有火災諸宮寺或一日再三發又

夜有訛言擊鼓相驚陳蕃劉智茂上疏諫曰
古之火皆君弱臣強極陰之變也前始春而
獄刑慘故火不炎上前入春節連寒木冰暴
風折樹又八九州郡並言隕霜殺菽春秋晉
執季孫行父木爲之冰夫氣弘則景星見化
錯則五星開日月蝕災爲已然異爲方來恐
卒有變必於三朝唯善政可以已之願察臣
前言不棄愚忠則元元幸甚書奏不省續漢書五
行志二注引延熹八年又桓帝紀注引是時
連月大災諸寺或一日三發又夜有訛言

擊鼓相驚陳蕃等上疏諫曰唯善政可以己之書奏不省

是時宦豎專朝鉤黨事起上尋無嗣陳蕃竇

武爲曹節等所害天下無復紀綱

續漢書五行志二注

時延熹九年三月癸巳京都夜有火光

靈帝

建寧二年爵乳母趙堯爲平氏君

御覽一百九十八惠

氏後漢書補注十四

禱於龍塚

續漢書五行志三建寧四年二月河水清下注姚之駟本龍塚作龍

潔

河東水暴出續漢書五行志三建寧四年五月山水大出漂沒廬舍五百餘家注

案張角一時狡亂不足致此大妖斯乃曹氏

滅漢之徵也

續漢書五行志五注時光和元年五月壬午有白衣人欲入德

陽門曰我梁伯夏敎我上殿爲天子志以爲張角稱皇天作亂之應故袁氏駁之

光和三年正月虎見平樂觀又見憲陵上嚙

衛士蔡邕封事曰政有苛暴則虎狼食人續漢書五行志一注

書五行志一注

光和四年又於西園弄狗以配人續漢書五行志一注

是年七月虹晝見於御坐玉堂後殿庭中色

青赤

五行志五注光和四年

是時羣賊起天下始亂讖曰寒者小人暴虐

專權居位無道有位謫罰無法又殺無罪其

寒必暴殺

五行志三注時光和六年冬大寒北海東萊琅邪井中冰厚尺餘

中平四年雲氣如足相次重疊彌天

御覽八百七十七

七

山陽梁沛彭城下邳東海琅邪七郡大水

續漢

書五行志三中平五年郡國六水大出注引山陽至琅邪下云則是七郡惠氏後漢書補

注四於靈帝紀郡國七大小下引山陽梁沛
彭城下邳東海琅邪七郡也

獻帝

三年十月丁卯日有重兩倍吳書載韓馥與

袁術書曰凶出於代郡

續漢書五行志六注
三年謂初平三年

時帝流遷失政養奮對策曰當溫而寒刑罰

慘也

續漢書五行志三注時初平四年六月
寒風如冬時

雹殺人前後雨雹此最爲大時天下潰亂

續漢書

五行志三初平四年六月右扶風雹如斗

興平二年十二月月在太微端門中重暈二

珥兩白氣廣八九寸貫月東西南北

續漢書五行志

六注

曹操專政十七年七月大水洧水溢

續漢書五行志

三建安二年九月漢水流害民人下注案此云十七年則當注於下文十八年六月大水下蓋曹操於建安元年遷帝於許此專政之始志云十八年後袁書一年

明年禪位于魏

續漢書五行志三建安二十四年八月漢水溢流害民人

注禪位于魏四字又見五行志一注

獻帝崎嶇危亂之間飄薄萬里之衢

書鈔二

此二萍流蓬轉嶮岨備經自古帝王未之有

也觀其天性慈愛弱而神惠若輔之以德眞
守文令主也曹氏始於勤王終至滔天遂力
制羣雄書鈔二十二引負鼎而趨然因其利
器假而不反迴山倒海遂移天日昔田常假
湯武而殺君操因堯舜而竊國所乘不同濟
其盜賊之身一也善乎莊生之言曰竊鉤者
誅竊國者爲諸侯之門仁義在焉信矣御覽
九十
二惠棟後漢書補注四不同下無濟字

赤眉

天鳳五年樊崇起兵於莒號曰赤眉圍莒數月或說樊崇曰豈有父母之國而攻之者乎莒中人出縑千疋以自贖乃散去

御覽八百十八惠氏後漢書補注五引莒人出縑千匹以自贖乃散去

劉盆子居長樂宮赤眉諸將日會論功名自言欲爲某王欲得某官爭言號呼拔劍相擊

御覽四百九十六惠氏後漢書補注五引赤眉諸將自言欲爲某王至末

赤眉復入長安止桂宮逢安將千餘人攻延岑於杜陽鄧禹以赤眉精兵在外唯盆子羸

弱在長安攻之與謝祿夜戰橐街中鄧禹敗走逢安西與延岑蘇茂李寶戰於杜陽大破之寶茂降岑收散卒還戰寶茂從內拔赤眉旗自立其幟赤眉還驚亂走自投川死者十餘萬人

御覽三百四十一

劉盆子

劉盆子拜竟復從劉仲卿居仲卿爲盆子制絳單衣

御覽八百十四

世祖令盆子賞甚厚以爲起王郎中後以疾

失明賜均輸官地以爲列肆使食稅終其身
御覽八百二十八

長安宮人

赤眉入長安掖庭中有數百千人自更始敗
閉殿門不出掘庭中蘆葦根捕池中魚食之
死因埋宮中有故祠甘泉樂人尙共擊鼓歌
舞衣服鮮明見盆子叩頭言飢盆子使中黃
門廩之粟數升後盆子去皆餓死
御覽四百八十六

賈復

賈復從擊鄧奉追至夕陽聚

續漢書郡國志四注

耿況

使光祿大夫樊宏詔況曰惟況功大不宜監察從事邊郡寒苦不足久居其詣行在所

後漢書耿弇傳注

耿弇

弇少學詩禮明銳有權謀

後漢耿弇傳注

弇上書曰臣據臨淄深塹高壘張步從劇縣來攻疲勞饑渴欲進誘而攻之欲去隨而擊

之臣依營而戰精銳百倍以逸待勞以實擊
虛旬日之間步首可獲上是其計

後漢書耿
弇傳注

馮異

先是諸將同營吏卒多犯法

後漢書馮異傳
異爲人謙退進

止皆有表識軍中號爲整齊每所止舍諸將
並坐論功及破邯鄲乃更部分諸將各有配
隸下注

宋弘

宋弘爲司空秉政恭約輕財重義有公儀之

風不與民爭利

書鈔五十二惠氏後漢書補
注八引無末五字

侯霸

侯霸拜大司馬矜嚴有威容奉公無私

書鈔五十二

伏湛

伏湛建武二年拜尚書典定舊制

書鈔六十

任隗

任隗爲司空以玄默守眞不求名譽義行內

修人以此服之

書鈔五十二

楊統

統在縣休徵時序風雨得節嘉禾生於寺舍
人庶稱神

後漢書楊厚傳注統楊厚父

楊厚

鄧后問厚曰大將軍鄧騭應輔臣否對曰不
應以此不合其旨

後漢書楊厚傳注

韓卓

韓卓字子助陳留人臘日奴竊食祭其先人

卓義其心卽日免之

藝文五曰帖四後漢書符融傳注先下無人字

御覽三十三先人作母又五百二十六臘祭
先人作母

羅威

羅威母年七十天寒常以身溫席而後授其處

初學記十七

楊終

時蜀郡有雷震決曹終上白記以爲斷獄煩苛所致太守乃令賦雷電之意而奇之

後漢書楊

終傳時終年十三

侍中賈逵薦忠博達忠徵拜郎中及卒賜

錢二十萬

後漢書楊忠

袁山松後漢書

竇憲竇景

河南尹王調漢陽太守朱敞南陽太守蒲陰

高丹等皆其賓客

後漢書袁安傳注時安劾憲景等竝寢不報憲景等

日益橫盡樹其親黨賓客於名都大郡蒲陰姚本作滿陰

徐璆

璆少履清高立朝正色稱揚後進惟恐不及

後漢書徐璆傳注

王充

充幼聰明詣太學觀天子臨辟雍作六儒論

後漢書王充傳注六姚本作大疑六字誤

充所作論衡中土未有傳者蔡邕入吳始得之恒秘玩以爲談助其後王朗爲會稽太守又得其書及還許下時人稱其才進或曰不見異人當得異書問之果以論衡之益由是遂見傳焉

後漢書王充傳注

朱穆

朱穆上書曰養魚沸鼎之中棲鳥烈火之上用之不時必也焦爛

文選邱希範與陳伯之書注

桓帝時南陽語曰朱公叔肅肅如松柏下風
御覽四百九十五

穆著論甚美蔡邕嘗至其家自寫之
後漢書朱穆傳

注

蔡邕議曰魯季文子君子以爲忠而諡曰文
子又傳曰忠文之實也忠以爲實文以彰之
遂其諡曰文忠先生苟爽聞而非之
後漢書朱穆傳
穆卒蔡邕復與門人共述其體行諡曰文忠
先生下注

楊匡

匡一名章字叔康

後漢書杜喬傳注楊匡喬故採

吳祐

吳祐放猪於長垣澤中誦經而行遇父故人謂之曰子二千石子掉鞭而誦經行吟於澤畔繼子無恥奈君父何祐守志如初與北海公沙穆遊太學資乏變服爲傭祐賃使春遂爲死交於杵臼之間

御覽九百三又四百七引吳祐放猪長垣澤中

誦經而行北海公沙穆遊太學資乏變服爲傭與祐賃春遂爲交於杵臼之間

吳祐舉孝廉將行郡中爲祖道祐越壇其小

吏雍邱黃真歡語移時與結友而別

書鈔七十七姚

本末有後真亦舉孝廉六字

公沙穆

公沙穆有六子時人號曰公沙六龍天下無

雙

御覽四百九十四惠氏後漢書補注十九引

楊震

楊震好學講書有鵜雀銜三鱸魚飛集講堂
前都講進曰蛇鱸者大夫之象也數有三者
法三台也先生自此升矣

初學記二十四

延篤

延篤字叔堅南陽人也爲京兆尹正身率下

民不忍欺

御覽二百五十二

岑暉

岑暉字公孝高才絕人五經六藝無不洞貫

太守成瑨請爲功曹時謠曰南陽太守岑公

孝弘農成瑨但坐嘯

御覽六百六十二惠氏後漢書補注十六引暉

才高絕人五經六藝無不洞覽

岑暉有高才郭林宗朱公叔等皆爲友李膺

王暢稱其有幹國器雖在閭里慨然有董正天下之志太守弘農成瑨下車欲振威嚴聞
臣名請爲功曹

書鈔七十七陳禹謨補引

李膺陳蕃

桓帝時京師稱曰李元禮巖巖如玉山陳仲
舉軒軒如千里驥

御覽四百九十五

陳蕃

陳蕃遷豫州在郡不接賓客獨坐一室唯徐
孺子來爲置對榻去則懸之及徵爲尚書令

送之者亦不出郭門

御覽四百五

八俊

桓帝時朝廷日亂李膺風格秀整高自標尚
後進之士升其堂者以爲登龍門太學生三
萬餘人勝天下士上稱三君次八俊次八顧
次八及次八厨猶古之八元八凱也因爲七
言謠曰不畏強禦陳仲舉九卿直言有陳蕃
天下模楷李元禮天下好交荀伯修天下英
秀王叔茂天下冰楞王秀陵天下忠平魏少

英天下稽古劉伯祖天下良輔杜周甫天下
才英趙仲經

御覽四百六十五

賈彪

賈彪遊京師郭林宗李元禮等爲談論之首
一言一行天下以爲準的黨錮事起彪謂同
志曰吾不西行大難不解矣卽入關乃設方
畧天子爲之大赦

初學記二十藝文五十二
賈彪下有字偉節三字遊
京師下作與郭林宗等爲談論之首以下同

應奉

奉又刪史記漢書及漢記三百六十餘年自
漢興至其時凡十七卷名曰漢事後漢書應
奉傳注案
十七卷疑有誤

周璆

周璆爲高唐令書鈔三十六

周璆字孟玉爲樂城令逍遙無事縣中大治
去官徵聘不至陳蕃爲太守璆來置榻去則
懸之御覽四百七十四

范滂

李膺等下獄獄吏曰諸人獄當祭臯繇以祈福范滂曰臯繇古之賢臣知滂無罪將理之於天如其有罪祭之何益及訊獄王甫以次詰之滂年少在後越次而前甫曰夫合黨連羣必有盟誓其所謀圖皆何等耶滂曰竊聞仲尼之言見善如不及見惡如探湯欲使善善齊其情惡惡同其行謂王政之所思不悟反以爲黨乃仰天嘆曰古之修善自求多福今之修善身陷大戮死之日願賜一幡埋於

首陽山側上不負皇天下不愧夷齊尚書霍
謂以黨事無驗表陳赦之御覽四百二十七

隗相

隗相養母至孝母好飲江流相常隆冬取水
後一朝橫石浮江無有難涉由是顯名姚之駟後漢書補逸

范丹

范丹字史雲外黃人爲縣吏年十八棄衣物
道邊家以爲死遂西入關學爲萊蕪長去官

於市賣卜妻紡績以自給辟公府步行無被
囊自隨常使兒捃麥得五斛鄉人遺之一斛
屬兒曰莫令尊君知兒歸不敢不道丹卽令
並送六斛言麥已雜遂不取丹弟子愷見丹
藩不完載柴將藩之時丹適行還怒勅子拔
柴載還之間里歌之曰甌中生塵范史雲釜
中生魚范萊蕪自以性急每爲吏常佩韋御覽
四百二十五又二百六十七引范丹爲萊蕪
長去官常便賣卜以自給步行無車被囊自
隨又七百七引范丹爲萊蕪長去官無被空
囊自隨也又八百三十八引范丹字史雲外

黃人使兒拈麥得五斛鄉人尹臺遺之一斛
屬兒莫道丹後知卽令并送六斛言麥已雜
遂誓不受後漢書范冉傳注引冉去官使兒
拈拾麥以下同案范冉卽范丹又御覽五百
十二引范丹爲萊蕪長去官於市賣卜妻紡
織以自給丹弟子愷見丹藩不完載柴將藩
之時丹適行還怒勅子拔柴載以還之惠氏
後漢書補注十九引棄衣物道旁家以爲死
遂西入關學又引丹弟子愷至拔柴載還之
案步行無下脫車字

劉洪

劉洪字元卓泰山蒙陰人魯王之宗室也延
熹中以校尉應太史徵拜郎中遷常山長史
以父憂去官後爲上計掾拜郎中檢東觀著

作律厯記遷謁者穀城門候會稽東部都尉
徵還未至領山陽太守卒官洪善算當世無
偶作七曜術及在東觀與蔡邕共述律厯記
考驗天官及造乾象術十餘年考驗日月與
象相應皆傳於世

續漢書律厯志中注

蔡邕

邕議曰漢承亡秦滅學之後宗廟之制不用
周禮每帝卽位世輒立一廟不止於七不列
昭穆不定迭毀元皇帝時丞相匡衡御史大

夫禹貢始建大議請依典禮孝文孝武孝宣
皆以功德茂盛爲宗不毀孝宣尊崇孝武歷
稱世宗中正大臣夏侯勝等猶執異議不應
爲宗至孝成皇帝議猶不定太僕王舜中壘
校尉劉歆據不可毀上從其議古人據正重
順不敢私其君若此其至也後遭王莽之亂
光武皇帝受命中興廟稱世祖孝明皇帝聖
德聰明政參文宣廟稱顯宗孝章皇帝至孝
烝烝仁恩博大廟稱肅宗皆方前世得禮之

宜自此以下政事多釁權移臣下嗣帝殷勤
各從褒崇至親而已臣下懦弱莫能執夏侯
之直今聖朝遵古復禮以求厥中誠合禮議
元帝世在第八光武世在第九故以元帝爲
考廟尊而奉之孝明遵述亦不敢毀孝和以
下穆宗威宗之號皆省去五年而再殷合食
于太祖以遵先典議遂施行

續漢書祭祀志
下注姚本首有

和帝以下功德無殊而有過差不應爲宗及
餘非宗者追尊三后皆宜毀之因奏議曰云
云蓋以范書補足其義非袁書本文

蘇謙蘇不韋

蘇謙字仲讓爲郡督郵李嵩爲美陽令貪暴謙案得其贓謙遷金城太守治有異迹延熹九年至京師嵩時爲司隸收謙誣陷之死獄中謙子不韋字公先變名姓以家財求劒客邀嵩不得嵩遷大司農乃於司農府旁買舍夜爲地穴突入嵩室中嵩適徙不中破其臥具嵩大怖棘屋上以板棧地而臥一夜數徙不韋乃至魏郡掘嵩父冢斬級以祭父墓

御覽

羊續

靈帝欲以羊續爲太尉時拜三公者輸東園禮錢千萬令中使督之續乃坐使者於單席舉組袍以示之曰臣之所資惟斯而已故不登公位

藝文六十七御覽六百九十三引無坐使者於單席六字又藝文四十六引太尉劉虞讓位於羊續靈帝時爲三公者皆輸禮錢千萬續舉組袍以示之曰臣之有唯此而已遂不代虞御覽二百七引同

劉陶

劉陶字子奇拜諫議大夫是時天下日危寇
賊方熾陶憂致崩亂疏陳八事大較言天下
大亂皆由宦官詔收陶繫黃門北寺獄陶對
使者曰恨不與伊呂同儔而以三仁爲輩遂
閉氣而死

姚氏補逸

柳分

柳分權豪之黨爲范滂所奏者

續漢書五行志一注

朱雋

朱雋擊黃巾賊趙弘於南陽斬之賊復以韓

忠爲帥雋兵力少不能急攻乃先起土山以
臨之因僞修攻具曜兵於西南雋身自被甲
將精卒乘其東北遂得入城忠乞降御覽三百二十七

皇甫嵩

皇甫嵩字義真安定朝那人善用兵飲食舍
止必先將士然後乃安兵曹有受賂者嵩曰
公素廉必資用乏乃出錢賜之吏羞慙而自
殺由是衆皆樂爲致死御覽四百九十一又六百四十一

盧植

尚書盧植將終勅其子彊以禪葬以土穴其子從之

姚氏補逸

陳弇

陳弇字仲明陳留人學尚書躬自耕種常有黃雀飛來隨弇翱翔

御覽九百二十二藝文九十二無字仲明陳留人六字

荀淑陳寔

荀淑與陳寔神交及其棄朗陵而歸也數命

駕詣之淑御慈明從叔慈抱孫文若而行寔
亦令元方侍側季方作食抱孫長文而坐相
對怡然嘗一朝求食季方尙少跪曰向聞大
人荀君言甚善竊聽之甌壤飯成糜寔曰汝
聽談解乎詎曰唯因令與二慈說之不失一
辭二公大悅御覽四百三十二又七百五十
七引荀淑與陳寔神交相善棄
官常命駕相執令元方侍側季方作食嘗
朝食遲季方晚日向聞大人與有君言甚善
竊聽之甌壤飯糜寔曰汝聽談解不答曰解
令說之不誤一言公說

王允

王允字子師世仕州郡爲冠蓋郭林宗見而
奇之曰王生一日千里王佐才也遂與之友
善允仕至司徒藝文二十二白帖四十三御覽四百四十四引字子師下有太原人三字

李傕等兵入城王允奉天子保宣平樓允謂
傕等曰臣無作威作福將軍乃放縱欲何爲
乎傕等不應自拜署揚武將軍汜爲揚烈將
軍樊稠等皆爲中郎將姚氏補逸案續漢書五行志一注止引李傕等攻破長安城害允等十一字此條未見所出俟考

沮儁

儁年二十五其督戰訾寶負其屍而瘞之

後漢書

董卓傳注案儁爲射聲校尉罵李傕而死

袁紹

紹司空逢之孽子出後伯父成

後漢書袁紹傳注

李瓚

李膺子瓚位至東平相初曹操微時瓚異其
才將沒謂子宣等曰世將亂矣天下英雄無
過曹操張孟卓與吾善袁本初汝外親雖爾

勿依必歸曹氏諸子從之並免亂世

御覽四百四十

何顒

南陽何顒初見曹操嘆曰漢將亡安天下者必此人也操以是嘉之

御覽四百四十二

射侯

天子皮弁素纁親射大侯

續漢書禮儀志上注

北郊

行夏之時殷祭之日犧牲尙黑耳

續漢書祭祀志中注

營頭

怪星晝行名曰營頭行振大誅

續漢書天文志上注

置郡分郡

建安二十年復置漢寧郡漢中之安陽西域

郡分錫上庸爲上庸郡置都尉

續漢書郡國志五注又後

漢書劉焉傳注引建安二十年置漢寧郡

興平元年分安定鶉觚右扶風之漆置新平

郡續漢書郡國志五注

朔山

有朔山

續漢書郡國志二陽安道亭故國下注

縣上聚

界休縣有介山有縣上聚子推廟

水經汾水注引袁郡

國志惠棟後漢書補注二十三

汎亭

其縣有汎亭周凡伯國

水經清水注引袁郡國志惠棟後漢書補

注二十二引汎亭周凡伯國

闕與聚

涅縣有闕與聚

水經濁漳水注引袁郡國志惠氏後漢書補注二十三引

袁山松後漢書

袁山松曰闕與今梁榆城是也盧湛艱征賦
曰訪梁榆之虛障弔闕與之舊平案水經注
云司馬彪袁山松並言涅縣有闕與聚盧湛
征艱賦曰訪榆梁之虛郭弔闕與之舊都袁
豹亦云闕與今梁榆城是也案袁豹字士蔚
見晉書又見世說文學篇注今以袁豹語混
作袁山松語誤矣

漢源

漢有二源東出氐道西出西縣之嶓冢山水經
漾水注引袁郡國志

垂惠聚

山桑縣有垂惠聚

水經陰溝水注引袁郡國志
惠氏後漢書補注五

西域

西域出諸香石蜜

後漢書李恂傳注

姊歸

屈原有賢姊聞原放逐亦來歸喻令自寬全

鄉人冀其見從因名曰姊歸

惠氏後漢書補注二十三引袁

郡國志案此見水經江水二注又引袁山松並

不云郡國志江水二注下又引袁山松並

蓋楚子熊繹之始國而屈原之鄉里也而此

止引袁山松曰故惠誤以爲袁郡國志也其

實以宜都記中語案水經引袁山松曰而不

繫以郡國志者多是宜都記據太平御覽一

百六十七歸州引袁山松記曰屈原此縣人

既被流放忽然暫歸其姊亦來因名其地爲

姊妹歸正是一書

袁山松後漢書

後漢書百官志二太常卿每祭祀先奏其
禮儀及行事常贊天子惠氏補注二十四
云常依注及袁山松百官志當作掌